

## Frumvarp til laga

um breytingu á lögum um náttúruvernd, nr. 60/2013 (rusl á almannafæri, sektir).

Flm.: Guðlaugur Þór Þórðarson, Elín Hirst, Ragnheiður Ríkharðsdóttir,  
Ásmundur Friðriksson, Haraldur Benediktsson, Jón Gunnarsson,  
Valgerður Gunnarsdóttir, Vilhjálmur Árnason.

### 1. gr.

Á eftir 1. mgr. 17. gr. laganna kemur ný málsgrein, svohljóðandi:

Öllum sem fara um hálendið og þjóðvegi landsins er óheimilt að fleygja rusli eða öðru þess háttar á almannafæri nema í þar til gerð ílát. Brot á ákvæði þessu varðar refsingu, sbr. 90. gr.

### 2. gr.

Á eftir 2. mgr. 90. gr. laganna kemur ný málsgrein, svohljóðandi:

Það varðar mann sektum að lágmarki 100.000 kr. ef hann brýtur ákvæði 2. mgr. 17. gr.

### 3. gr.

Lög þessi öðlast þegar gildi.

### Greinargerð.

Rusl sem er fleygt á víðavangi er augljóst lýti á umhverfinu. Með því að láta slíkt framferði óáreitt sköðum við þau verðmæti sem felast í íslenskri náttúru. Erlendis er þekkt að greiða þarf háar sektir fyrir að henda rusli á víðavangi.

Með frumvarpinu er lagt til að lögfestar verði aðgerðir til að halda náttúrunni hreinni og stuðla að bættu hugarfari.